



SAMÞYKKTIR KNATTSPYRNUFÉLAGSINS VALS

1. grein

Heiti

Félagið heitir Knattspyrnufélagið VALUR. Aðsetur þess er að Hlíðarenda í Reykjavík.

2. grein

Markmið

Markmið félagsins er að iðka og útbreiða knattspyrnu, handknattleik og körfuknattleik karla og kvenna.

Félagið er almennt félag og er því heimilt að vera eigandi í hlutafélögum, standa að stofnun sjálfseignarstofnana o.s.frv.

3. grein

Merki og búningar

Merki félagsins er skjöldur, en grunnur hans sól, sem sendir frá sér rauða og bláa geisla og í miðjum fleti skjaldarins er fljúgandi valur með knött í klónum. Á knöttinn skal letra nafnið VALUR. Búningur félagsins er rauð treyja, hvítar buxur og rauðir sokkar.

4. grein

Aðild að heildarsamtökum

Félagið er deild í K.F.U.M. og aðili að Í.S.Í. og sérsamböndum þess, eftir því sem við á hverju sinni.

5. grein

Félagar, félagaskrá og félagsgjöld.

Félagi getur hver sá orðið sem óskar þess og samþykkir að taka á sig þær skyldur er því fylgja. Sérhverjum félagsmanni ber að greiða félagsgjald til félagsins. Félagsstjórn ákveður félagsgjald árlega. Greiði félagsmaður ekki félagsgjald sitt næstliðið ár fyrirgerir hann réttindum sínum skv. 10. gr. samþykktu þessara.

Félagsstjórn skal halda félagaskrá á tölvutæku formi.

Félagsstjórn getur kjörið heiðursfélaga úr röðum félagsmanna. Heiðursfélagar eru undanþegnir greiðslu félagsgjalda.

6. grein

Skipulag félagsins

Aðalfundir og aukaaðalfundir eru æðsta vald í málefnum félagsins. Félagsstjórn er æðsti aðili í málefnum þess milli aðalfunda. Félagsstjórn ræður framkvæmdastjóra sem ræður annað starfsfólk.

Starfsemi félagsins er skipt í þrjú megin svið: Barna- og unglingsvið, afrekssvið og fasteignasvið. Félagsdeildir með sérstakar stjórnir starfa innan afrekssviðs og sinna afreksstarfi í knattspyrnu, handknattleik og körfuknattleik. Deildarstjórnir starfa í umboði og á ábyrgð félagsstjórnar sbr. 16. gr.

7. grein

Aðalfundur félagsins, fundartími, boðun og breytingar á samþykktum

Aðalfundur félagsins hefur æðsta vald og ákvörðunarrétt í öllum málum þess. Skal hann haldinn eigi síðar en 30. apríl ár hvert. Auglýsa skal aðalfundinn opinberlega með viku fyrirvara. Aðalfundurinn telst lögmætur, ef löglega er til hans boðað.



SAMÞYKKTIR KNATTSPYRNUFÉLAGSINS VALS

Tillögur til breytinga á samþykktum félagsins skal senda félagsstjórn eigi síðar en viku fyrir aðalfund. Heimilt er þó að taka fyrir á aðalfundi tillögur til breytinga á samþykktum félagsins, sem síðar koma fram ef 2/3 hluta atkvæðisbærra fundarmanna eru því samþykkir.

8. grein Dagskrá aðalfundar

Dagskrá aðalfundar skal vera sem hér segir:

1. Formaður félagsins setur fundinn.
2. Kosinn fundarstjóri
3. Kosinn fundarritari
4. Fundargerð síðasta aðalfundar lögð fram til samþykktar.
5. Formaður félagsins leggur fram skýrslu félagsstjórnar um starfsemi og framkvæmdir á liðnu starfsári.
6. Framkvæmdastjóri félagsins leggur fram og útskýrir endurskoðaða reikninga félagsins fyrir liðið starfsár til samþykktar.
7. Framkvæmdastjóri félagsins leggur fram rekstraráætlun næsta starfsárs.
8. Breytingar á samþykktum sbr. 7., 9. og 21. gr.
9. Kosinn formaður
10. Kosnir sex stjórnarmenn en þrír þeirra skulu jafnframt vera kosnir formenn hinna þriggja deilda.
11. Kosnir þrír til sex stjórnarmenn í stjórn hverrar deildar.
12. Kosinn löggiltur endurskoðandi eða endurskoðunarfélag og einnig 2 félagslegir skoðunarmenn.
13. Önnur mál.

9. grein Atkvæðagreiðslur á aðalfundi félagsins

Á aðalfundi félagsins ræður einfaldur meirihluti úrslitum mála, nema þegar um er að ræða tillögur til breytinga á samþykktum félagsins, en þær verða að samþykkjast af 2/3 atkvæðisbærra fundarmanna. Kosningar skulu vera skriflegar sé þess óskað. Séu atkvæði jöfn skal kosning endurtekin. Verði atkvæði þá enn jöfn skal hlutkesti ráða.

10. grein Kjörgengi, atkvæðisréttur og tillöguréttur á aðalfundi félagsins.

Allir skuldlausir félagsmenn 16 ára og eldri hafa kjörgengi til stjórnarstarfa, atkvæðisrétt, tillögurétt og málfrelsi á aðalfundi félagsins.

11. grein Aukaaðalfundur félagsins

Aukaaðalfundur félagsins má halda ef félagsstjórn álitur þess þörf eða ef þess er óskað skriflega af a.m.k. 10% kjörgengra félagsmanna.

Aukaaðalfundur er lögmeður sé til hans boðað skv. ákvæðum 6. gr. samþykktanna.

12. grein Reikningsár

Reikningsár er frá og með 1. janúar til og með 31. desember ár hvert.



SAMÞYKKTIR KNATTSPYRNUFÉLAGSINS VALS

13. grein

Verkefni félagsstjórnar

Félagsstjórn ber að efla félagið á allan hátt og gæta hagsmuna þess í hvívetna. Hún hefur umráðarétt yfir eignum félagsins og markar stefnu þess milli aðalfunda. Félagsstjórn skipar alla trúnaðarmenn félagsins í nefndir og ráð innan íþróttahreyfingarinnar, sem félagið á aðild að. Félagsstjórn skipar fulltrúa í sérráð Í.B.R. á aðalfundi sérráða Í.B.R. og á ársþing sérsambanda Í.S.Í. að fenginni umsögn stjórnar einstakra deilda.

Félagsstjórn kemur fram út á við fyrir hönd félagsins og ritar nafn þess. Þá veitir félagsstjórn framkvæmdastjóra prókúruumboð.

Halda skal fundagerðir um stjórnarfundir og þær ákvarðanir sem þar eru teknar.

14. grein

Skipan félagsstjórnar.

Félagsstjórn skipa 7 menn, formaður félagsins sem kosinn er á aðalfundi og 6 meðstjórnendur kjörnir á aðalfundi, sem skipta með sér verkum þannig: varaformaður, tveir meðstjórnendur auk formanna knattspyrnudeilda, handknattleiksdeilda og körfuknattleiksdeilda.

Formaður boðar fundi í stjórn þegar hann telur þess þörf, eða ef einn stjórnarmaður óskar þess. Meirihluti atkvæða ræður úrslitum mála. Stjórnarfundir eru löglegir ef meirihluti stjórnar er mættur.

15. grein

Um starfssvið framkvæmdastjóra.

Framkvæmdastjóri er ráðinn af félagsstjórn og starfar í umboði hennar.

Framkvæmdastjóri ræður allt annað starfsfólk. Framkvæmdastjóri annast daglegan rekstur félagsins og skal í þeim efnum fara eftir þeirri stefnu og fyrirmælum sem félagsstjórn hefur gefið. Hann hefur umsjón með gerð rekstraráætlana fyrir félagið og ber ábyrgð á framkvæmd þeirra. Hinn daglegi rekstur tekur ekki til ráðstafana sem eru óvenjulegar eða mikils háttar. Slíkar ráðstafanir getur framkvæmdastjóri aðeins gert samkvæmt sérstakri heimild frá félagsstjórn, nema ekki sé unnt að biðja ákvarðana félagsstjórnar án verulegs óhagræðis fyrir starfsemi félagsins. Í slíkum tilvikum skal félagsstjórn tafarlaust tilkynnt um ráðstöfunina. Framkvæmdastjóri skal sjá um að bókhald félagsins sé fært í samræmi við lög og venjur og meðferð eigna félagsins sé með tryggilegum hætti. Félagsstjórn skal annast um að nægilegt eftirlit sé haft með bókhaldi og meðferð fjármuna félagsins.

16. grein

Starfssvið félagsdeilda í knattspyrnu, handknattleik og körfuknattleik

Hver félagsdeild skal hafa sérstaka stjórn sem kjörin er á aðalfundi félagsins, sbr. 8. gr. Starfsár félagsdeilda er það sama og félagsstjórnar.

Formaður viðkomandi félagsdeilda boða til stjórnarfundar deilda eftir því sem þörf krefur. Framkvæmdastjóri vinnur með deildarstjórnnum og skal sitja alla fundi þeirra ásamt fjármálastjóra og forstöðumanni afrekssviðs félagsins. Skulu þeir allir vera með málfrelsi og tillögurétt á deildarstjórnarfundum. Verkefni félagsdeilda er að stýra afreksstarfi viðkomandi íþróttagreinar, stuðla að framgangi hennar, skipulagi og kynningu út á við. Þá skulu stjórnir einstakra félagsdeilda standa að fjáröflun til styrkingar starfi og rekstri viðkomandi deilda.



SAMÞYKKTIR KNATTSPYRNUFÉLAGSINS VALS

Stjórnir deilda starfa í umboði og á ábyrgð félagsstjórnar. Stjórnunum deilda er óheimilt að skuldbinda félagið fjárhagslega.

Í lok hvers starfsárs skal hver deildarstjórn skila til félagsstjórnar starfsskýrslu fyrir liðið ár og áætlun um fjárþörf fyrir næsta starfsár. Starfsskýrslur skulu birtar í sameiginlegri skýrslu félagsins á aðalfundi.

17. grein **Fulltrúaráð**

Fulltrúaráð skal vera starfandi innan félagsins samkvæmt sérstökum reglum sem samþykktar eru á aðalfundi félagsins.

18. grein **Viðurkenning, heiðursmerki**

Félagsstjórn veitir viðurkenningu fyrir íþróttárangur eða störf í þágu félagsins eða íþróttahreyfingarinnar samkvæmt sérstökum reglum sem samþykktar eru á aðalfundi félagsins. Þá kýs aðalstjórn heiðursfélaga.

19. grein **Félagsslit**

Verði félagið í heild óstarfhæft í 5 ár samfleytt, skal því slitið. Við félagsslitin skulu eignir þess renna til K.F.U.M. í Reykjavík, sem skal ráðstafa þeim til íþrótt- og eða æskulýðsstarfa innan vébanda sinna. Ekki má breyta 1. og 19. grein samþykka félagsins.

20. grein **Viðurlög**

Hafi meðlimur félagsins brotið samþykktir þess með framkomu sinni, hnekt álit félagsins og markmiði verulega, skal honum hegnt með brottrekstri úr félaginu samkvæmt ákvörðun félagsstjórnar. Úrskurður hennar er því aðeins gildur að 4/5 félagsstjórnar sé honum samþykkir. Skylt er félagsstjórn að boða hinn brotlega á sinn fund og gefa honum kost á að tala máli sínu. Ákvörðun félagsstjórnar skv. þessari grein verður borinn undir aðalfund félagsins.

21. grein **Breytingar á samþykktum.**

Samþykktum þessum mál ekki breyta nema á aðalfundi félagsins og þarf til þess samþykki 2/3 hluta atkvæðisbærra fundarmanna, sbr. 7. og 9. gr.

Tillögur til breytinga á samþykktum félagsins skulu tilkynntar með aðalfundarboðinu og skulu þær liggja frammi hjá félagsstjórn félagsins eigi skemur en 7 dögum fyrir aðalfund félagsins.

22. grein **Gildistaka**

Samþykktir þessi öðlast þegar gildi og jafnframt falla úr gildi eldri samþykktir félagsins.

Þannig samþykkt á aðalfundi Knattspyrnufélagsins Vals.
19. desember 2007